

每週經課朗誦經文（巴克禮台語漢字）2012/01/15

共同經課-1 撒母耳記上三章一節～十節、十一節～二十節

1 囡仔撒母耳佇以利的面前服事耶和華。當許個日，耶和華的話真稀罕，無常常有啓示。2 一日，以利囑佇家己的所在；伊的目矙已經霧，看袂明。3 上帝的燈猶未熄，撒母耳已經佇耶和華的殿，佇上帝的約櫃遐啲。4 耶和華叫撒母耳。伊應講：「我佇遮！」5 就走到以利遐，講：「我佇遮，因為你叫我。」以利講：「我無叫你，你倒去睏。」伊就去睏。6 耶和華閣叫撒母耳。撒母耳起來，去以利遐，講：「我佇遮，因為你叫我。」伊應講：「我的子啊，我無叫你，通閣去睏。」7 彼時撒母耳猶未識耶和華，耶和華的話未有啓示伊。8 耶和華第三擺叫撒母耳。撒母耳起來，去以利遐，講：「我佇遮，因為你叫我。」以利才知是耶和華叫囡仔。9 對按呢以利給撒母耳講：「你閣去睏；伊若閣叫你，你就講：『耶和華啊，請你講，你的奴僕聽！』」撒母耳就去，睏佇伊的所在。10 耶和華閣來倚啲，親像前幾若擺叫：「撒母耳啊！撒母耳啊！」撒母耳應講：「請講，你的奴僕啲聽！」11 耶和華給撒母耳講：「看啊，我佇以色列中欲行一項事，互聽見的人二個耳孔欲抖起來。12 我論以利的家所講的，到彼日，頭到尾我欲應驗佇伊。13 我曾給伊講我欲為著伊所知的罪永遠審判伊的家，因為伊的子家己招咒詛，伊也無禁止 in。14 所以我有對以利的家咒誓講：『以利的家的罪過，雖然祭祀禮物，永遠袂會贖回。』」15 撒母耳睏到天光，就開耶和華的殿門，撒母耳毋敢將異象給以利講。16 以利叫撒母耳講：「我的子撒母耳啊！」17 伊應講：「我佇遮！」以利講：「耶和華對你講甚麼？求你毋通隱瞞佇我；若將伊所給你講的對我隱密一句，願上帝加倍責罰你。」18 撒母耳就將許個話攏給伊講，也無對伊隱瞞。以利講：「是耶和華，願伊照伊所看做好的來行。」19 撒母耳漸漸大漢，耶和華及伊佇啲，互伊所講的無一句無應驗。20 對但到別是巴所有的以色列人攏知撒母耳受設立做耶和華的先知。

共同經課-2 詩篇三九篇一節～六節、十三節～十八節

1 〔大衛的詩，交互樂官。〕耶和華啊，你已經鑑察我，識我。2 我坐落去，我緝起來，你攏知；你對遠遠知我的念頭。3 我行路，我倒佇眠床，你攏詳細知；我一切所行的，你也深知。4 耶和華啊，我的嘴所講的話，你無一句毋知。5 你佇我的前後圍我，接手佇我的頂面。6 此款的知识奇妙，我袂會測度，真高，我袂會到。13 因為我的臟腑是你所創造的；我佇老母的腹肚內，你有庇佑我。14 我欲感謝你，因為我受造，奇妙通驚；你的所做奇妙，這是我的心深知的。15 我佇暗中受造，佇地的真底受聯絡；彼時，我的形體無隱瞞佇你。16 我未成形的體質，你的目矙已經看見；所定著的日，猶未有一日，攏記佇你的冊。17 上帝啊，你的意思對佇我到即寶貝！彼個數額到即多！18 我若欲算伊，比海沙卡多；我睏精神的時，猶原及你相及佇啲。

共同經課-3 哥林多前書六章十二節～二十節

12 凡事我攏通，若是無一盡有利益。凡事我攏通，若是無一項，我欲互伊管。13 食是為著腹肚，腹肚也是為著食；總是此二項上帝欲廢伊。獨獨身軀毋是為著淫亂，是為著主；主也是為著身軀。14 上帝曾互主復活，也欲對伊的權能互咱復活。15 豈毋知恁的身軀是基督的百體？我豈通將基督的百體互伊做娼妓的百體嗎？斷斷毋通！16 抑是恁毋知及娼妓聯合的，是及伊做一體？因為講：「二個欲成做一體。」17 獨獨及主聯合的，是一個神。18 著閃避淫行。人所犯，逐項的罪，攏是身軀外的，若是行姦淫的，是犯罪到佇家己的身軀。19 抑是恁毋知恁的身軀就是聖神的殿？聖神恁佇恁，就是恁對上帝所有的；閣恁毋是家己的，20 因為是用價錢買的。所以，著佇恁的身軀榮光上帝。

共同經課-4 約翰福音一章四十三節～五十一節

43 過二日，耶穌離開遐，去加利利。44 因為耶穌家己干證講：「先知人佇本所在無尊貴。」45 到加利利的時，加利利人接納伊，因為曾看伊佇耶路撒冷當節期中所行一切的代誌，因為 in 本身亦有去赴節期。46 耶穌閣到加利利的迦拿，就是伊用水變酒的所在。有王的人臣，伊的子破病佇迦百農。47 聽見耶穌對猶太到加利利，就去就近伊，求伊落去醫治伊的子，因為啲欲死啦。48 耶穌對伊講：「若無看見神蹟奇事，恁的確毋信。」49 王的人臣對伊講：「主啊，趁我的細子猶未死落來去。」50 耶穌給伊講：「去啊，你的子活啦！」彼人信耶穌給伊講的話就去。51 抵抵落去的時，伊的奴僕幾若人抵著伊，給伊講伊的子活啦。